

## Communicaziun a las medias

### Flavio Bundi daventa schefredactur RTR

Cuiria, ils 27-06-2017 – **Flavio Bundi (30) da Glion è il nov schefredactur da Radiotelevisiun Svizra Rumantscha. Il Sursilvan daventa a partir dals 1. da november 2017 successur da Gian Ramming. En sia nova funcziun responsescha el l'offerta da radio, televisiun ed online da RTR.**

Oz ha il cussegl d'administraziun da la Societad svizra da radio e televisiun SRG SSR elegì Flavio Bundi da Glion sco nov schefredactur RTR. L'elecziun è vegnida fatga sin proposta da la suprastanza da la societad purtadra SRG.R. Oscar Knapp, president da la SRG.R, è fitg cuntent cun l'elecziun: *«Sunter ina procedura da tscherna conscienziusa avain nus chattà cun Flavio Bundi in excellent candidat. El ha experientscha da render accessibel temas politicamain cumplexs ad in public vast. Medemamain enconuscha el fitg bain la scena culturala dal Grischun, e vegn cun sia moda e maniera frestga ed engaschada a purtar in nov vent en la chasa da medias rumantscha. La directura da RTR, Ladina Heimgartner, sa legra da la tscherna: «Sco dirigent e musicist passiuà sa Flavio Bundi co tractar armonias e dissonanzas. Ina impurtanta caracteristica per ina persuna che maina en la bransch da medias. Sin nossa via en il futur digital vegn Flavio Bundi a chapir da metter novs ed impurtants accents.»*

#### Approximid e sensibilisaziun stattan en il center

Flavio Bundi è creschì si a Glion ed ha fatg la matura en il gimnasi da la Claustra da Mustér. Suenter quatter onns tar la Guardia svizra papala a Roma ha el studegià germanistica, politologia e sociologia (focus sin medias e communicaziun) a l'Universitad da Berna. Durant e suenter ses studi ha el lavorà sco collavuratur liber tar il «Bündner Tagblatt». En ses temp tar la Guardia svizra papala a Roma è el stà schef da persunal e responsabel per las medias. En il Grischun è Flavio Bundi bain enconuschents per sia lavor sco cumponist e dirigent. El dirigia il «Chor mischedau Suraua» e maina il chor «kontra.cant». Per ses engaschament musical ha el survegnì l'emna passada in premi da renconuschientscha dal chantun Grischun.

Flavio Bundi è vicemanager da fatschenta da la Federaziun Svizra dal Parlament dals giuvens (Dachverband Schweizer Jugendparlamente) e responsabel per il program «easyvote». «easyvote» infurmescha simpel, chapibel e neutral davart fatschentas che vegnan en votaziun. Il program ha la finamira da motivar giuvens e giuvnas votantas dad ir a l'urna. *«La massa d'infurmaziun è ozendi fitg gronda. I dovra ina lavor da sensibilisaziun ed integrazziun cumpetenta ed chapibla. Quai, sco era l'approximid al public èn per mai ils elements centrals dal service public. Jau ma legrel zunt fitg sin questa nova sfida tar RTR.»*, di il nov schefredactur.

Flavio Bundi cumenza sia piazza ils 1. da november 2017. Il schefredactur partend, Gian Ramming, resta commember da la direcziun RTR e surpiglia ed installescha la nova partiziun «svilup».

#### Dapli infurmaziuns

Radiotelevisiun Svizra Rumantscha, Via da Masans 2, 7000 Cuiria  
Tamara Deflorin, scheffa communicaziun, tel. 081 255 75 09, 078 847 66 02, tamara.deflorin@rtr.ch